

Ti xroon tsíkjin

Santiago

Xrankíxixín nixja Santiago

1 ¹*Janhan Santiago, t'ahá ixra Díos la ko Ìnchéni Jesucristo, nixjahá kaín ti sin tsík'axrjeníxin ti teyó xjeen ch'in Israel, tsíxikayēhe sátsíkji kuenté chjasintajni.

Ti kjuaxrexinkaon jína tixín ti itjen Díos

²Jahara kíchóni, chrókócháhara kjónté chrók'uatsínkaxínra itsjé nkehe náxrjónhña, ³kixin ó nohara kixin ti ichrén nkehe náxrjónhña chrókóhanra kixin tinkachónkira Ìnchéni, la antsí tsofuerte asánra la ko tsjachara ts'atsínkara kaín nkehe. ⁴Andá ti xíkaha la antsí ndoá tsinkachónkira Ìnchéni, la antsí jína ts'ejora, la í tsicháxiāhñara ninkehó.

⁵Ti nkojinra t'itjáña tsonohara, la chrókjuanchehéra Díos, la jehe ch'an tsjajon ch'an kixin tsonohara jína la ko tsiénxinra jína. Kixin Díos la tjajon ch'an kaín ti nkehe t'áyēhe ti nkexro

tsjanchia, la tónínkákonhña ch'an. ⁶Ti ó tsjanchehéra Díos, la kaín asánra chrókjuanchiara, la chrókjóhya asánra ninkehó. Kixin ti nkexro kaínhña asén tjanchia la yóhe éxi ti ndañao sájtiko xrínto, xrankanikán ti tóhe la ko ti íjnko tóhe. ⁷Andá ti nkexro kaínhña asén tjanchia, la chróchéonhña sin kixin tsjatehe Ìnchéni. ⁸Ti nkexro tjenkayáxin ijnko nkehe ijie la íjnko nkehe ndóye, la nduáhya tjenkayáxin, la ts'áyēhya ninkehó.

⁹Andá ti kíchóni nóa, la chrókóchéhe sin kixin Díos la antsí tsjinkítsa ti jehe sin. ¹⁰*Andá ti nkexro rico la chrókónínkakohñña sin kjónté chrókuakitsje Díos ti nkehe tjete chóna sin, kixin ti nkehe chóna sin la yóhe éxi ti kayoa t'óna itsjo séhya tjak'e. ¹¹Ti ó tsjítōn ñao la imá tsośóa, la ti kayoa la tsoxámá la ts'ánótjen ti itsjo, la ti náxrjón tsjehe la ts'itjáña. Mé xíkaha ti chojni chóna itsjé nkehe tjete, la its'en sin la tsítōhe ti ixra kjuích'e sin.

**Ti nkehe náxrjónhña
tsøhen chojni**

¹²Díos sincheñao ti nkexro tsjacha ts'atsínka ti nkehe náxrjónhña. Ti tsjacha sin ts'atsínka sin kaín tíha, ndá ts'áyéhe sin ti kjuachón mé tíha la ti corona tsíndáchro Díos tsochjéhe kaín ti nkexro tjehe ti jehe ch'an. ¹³Andá ti nkojinra, tjénkayáxinra chrókjuich'era nkojín nkehe jínahña, la chrókjuénkayáxinhñara kixin Díos tjajon kjuachaxin xíkaha sich'era. Náhí. Díos la ch'ehya ti nkehe jínahña la ko tjajonhña ch'an kjuachaxin chrókjuasin chojni ijie. ¹⁴Andá ti nkojín chojni, ó jehí ndáchro asén sich'e nkojín nkehe jínahña, la xíkaha tsjasin sin ijie. ¹⁵Andá ti xíkaha tjenkayáxin chojni sich'e ti nkehe jínahña, la xíkaha tjasin sin ijie. Ndá ts'ánkí ti ijie la tíha tsjixín ti ts'enxín sin.

¹⁶Méxra kíchóni, chrókjuich'iyehya kichuara, ndoa chrókjuénkayáxinra. ¹⁷Kixin kaín ti nkehe jína t'áyéheni mé tixín ti itjen Díos, ti nkexro kjuíchéna kaín ti xrohi síin nkajní. Jehe ch'an mé ijnko Díos t'ixikíhya ch'an la ko sítiehya itjen ch'an. ¹⁸Díos kjuajon kjuachón k'uáyéheni kixin xíkaha tjinkaon ch'an kixin chrókokjíhi nixiéni kixin ti itan ndoa nixja, kixin ts'ónani éxi ti nkehe saoxín tsík'óna ts'áyéhe Díos, mé xíkaha tjinkaon ch'an chrók'uejóni.

Chrokuitekaoni ti nkehe chaxín

¹⁹Méxra, jahara kíchóni, antsí jína chrók'uejora chrókuihínra, la tjokahya chrókónínkaonra la ko tjokahya chrónixjara. ²⁰Kixin ti chojni tjoka tónínkaon, la ch'ehya sin ti nkehe tóxríhín Díos. ²¹Méxra títøhéra ti nkehe kjíta la ko ti nkehe jínahña síin chjasintajni, la chrókuitekáonra ti itan jína kuihínra, kixin tíha chóna kjuachaxin tsaáxinra.

²²Kjánchó jehya jehó chrókuihínra ti itan. Náhí. Kjaxin chrókjuákoxinra tíha. Andá ti náhi, la jahóra ch'iyehé asánra. ²³Andá ti nkexro tsinhón ti itan, la nchexiteyáhya, mé yóhe éxi ijnko chojni tsjexín ijnko xrosenta nkexrín tsjehe, ²⁴andá kjuixín tsjehe la sákjuí, la tuénxín k'uitjáñehen nkexrín itjen. ²⁵Andá ti nkexro t'itjáñehña ti nkehe kuíhín, la tjetsjehe jína nkexrín nixja ti ley tjajon kjuachaxin kjuaxróxin ts'ejóni, la jína la ko ndoa itjen ko titekaon mé kjuaxróxin tsjak'e.

²⁶Andá ti nkojín nkexro tjenkayáxin kixin imá tinkáchónki Díos, kjánchó chónahya kjuasàye, chjñé nixja, la jehó ch'iyehé asén, la ninkehó sínkíhya ti nkehe tinkáchónki.

²⁷Andá ti nkexro chaxín jína tinkáchónki Díos la tjasinhña ijie, la tjinkítsa ti sin nóa la ko ti sin ik'án chónahya nkehe sinie, la tjasinhña sin ti ijie síin chjasintajni.

**Nkokón chrókjuikosáyeheni
kíchóni**

2 ¹Kíchóni, jahara nkokón chrókjuikosáyehéra kaín chojni, ti chaxín tinkachónkira Ìnchéni Jesucristo chónṭa kaín kjuachaxin. ²Tjénkayáxinra; ti chrók'uixehen ijnko chojni rico ti tónkotséra, la chónṭa ch'an koch'aninko oro la ko chr'inkáya ch'an ika náxrjón, ndá kjaxin chrók'uixehen ijnko chojni nóa chr'inkáya ika ntaxin, ³andá ti chrókjuikosáyehéra ti nkexro rico chr'inkáya ika jína, la chróndáchera ch'an: “Jaha la tjak'étjaxian ntihi”, andá ti chojni nóa la chróndáchera ch'an: “Jaha la tjak'exián totá méhe o tjak'étjaxian nonte ó.” ⁴Andá ti xikaha sich'era, la nkokónhña tjikosayehéra kichuara la nduáhya tjénkayáxinra.

⁵Kíchóni, chrókuihínra tíhi: Díos tsíkjejá ti sin nóa ntihi chjasintajni kixin antsí chrókuinkáchónki sin ch'an la ts'áyéhe sin ti kjuachaxin kuènté ch'an éxi tsíndáchro ch'an ts'áyéhe kaín ti sin tjehe ti jehe ch'an. ⁶Andá jahara tjíkosayéhyara ti sin nóa, andá ti sin rico mé tjíkosayehéra. ¿Á jehya ti sin rico ti tjanchia sin ijie sátjiko sin ti jahara ti tjejó ti sin t'etōan ní? ⁷¿Á jehya jehe sin ti t'ándaxíhín sin ti ihníé Cristo tinkáchónkini ní?

⁸*Andá jahara, ti chaxín nchexiteyára éxi t'etōan ti ley, éxi nixja ti xroon itén Díos ndáchro: “Chrotjuehéra kichuara éxi tjuéxinra asánra”, la jína tjejonchexiteyára. ⁹Andá ti nkokónhña tjíkosayehéra chojni, la tjásinra ijie kixin nchexiteyáhyara éxi k'uētoan Díos. ¹⁰Andá ijnko nkexro titekaon kaín ti ley ndá kjuínchexiteyáhya ijnko nkehe, la mé chónṭa ijie kixin kjuínchexiteyáhya kaín ti nkehe t'etōan ti ley. ¹¹*Kixin ti Díos tsíndáchro: “Chrokjuásinkoáhyara ijie ijnko chojnichjin jehya ichjiánra”, la kjaxin tsíndáchro: “T'oañáhña kichuara.” Andá ti nkexro kjuasinkohya ijie ijnko chojnichjin, kjánchó kjuaya sin, la kjuínchexiteyáhya sin kaín ti nkehe t'etōan ti ley. ¹²Méxra jahara jína chrónixjara la ko jína chrókjuákoxinra kixin ó nohara kixin Díos mé tsotsjehe á jína kuitekáonra ti itén ch'an chrókuaáxini. Ndá ti náhi, la jehe ch'an tsjanchia ch'an ijie. ¹³Andá ti tsíkondehñani kíchóni, la Díos kjaxin tsíkondehña ti jeheni. Andá ti tsíkonoeheni kíchóni, la tsjachani ts'ejóni jína ti ñao tsitōexín ijie chojni.

Ti fe la ko ti ixra

¹⁴Kíchóni, ¿xá nke tsohen ti nkojinra tsondáchrora kixin tinkachónkira Díos, andá ninkehó nkehe jína

tjákoxinñara? ¿Á chrókjuacha chrókuaáxinra ti xíkaha ní?

¹⁵Chrokjuénkayáxinra tíhi: Ti chrók'uiskonra nkojín kíchóni ndoa o kíchóni ichjin chóntahya iké o chóntahya nkehe sinie, ¹⁶ndá jahara chróndáchera sin: “Sátjia nkojína la t'itsa ika la ko inte jína”, andá ti kjuájonhñara ti nkehe tichánxihin sin la ó chónkó ti nkehe ndáchrora. ¹⁷Mé xíkaha tsohen ti tinkachónkira Díos, ndá tjákoxinñara ninkehó nkehe jína, la ti tinkachónkira Díos la éxi ijnko nkehe tsík'en tíha.

¹⁸Andá ti nkojín nkexro chróndáchro: “Jaha tinkachónkia Díos, andá janhan it'a ti ixra jína.” Tjákoxián ti tinkachónkia Díos kjónté ch'ehya ti xra jína, la janhan tsjákoxián ti tinkachónkia Díos kixin ti ixra jína tjét'a. ¹⁹Jaha titekaon kixin nkoqoa Díos itjen, la jína tíha, kjánchó kjaxin ti Jínahña titekaon kixin nkoqoa Díos itjen la síxrànká, chrakon.

²⁰T'ónahña ijnko chojni lontí, kixin chróndáchrua kixin chaxín tinkachónkia Ìnchéni la chrókjuákoxián ti nkehe jína, ndá ti náhi, la ti tinkachónkia la éxi nkehe tsík'en tíha.

²¹*Díos tsíndáchro kixin chaxín jína ti ch'in Abraham, ti nkexro k'uaxrjeníxini ósé, kixin kjuínchexiteyá ch'an ti nkehe kjuanchia Díos la

chrók'óná ch'an ti xjeen ch'an Isaac chrók'uáyéhe Díos.

²²Chrókónoha kixin ti kuitekaon Abraham Díos la kjuákoxián ch'an kixin ti ixra jína kjuích'e ch'an, la xíkaha chaxín kuitekaon ch'an Díos. ²³*Mé xíkaha xiteyá ti ndáchro xroon itén Díos: “Abraham kuitekaon Díos la xíkaha ndáchro Díos kixin jína ch'an”, mé xíkaha ndáchro Díos kixin Abraham mé amigo kuènté ch'an.

²⁴Mé xíkaha chrókónoha kixin Díos nchetjóá ti chojni kixin ti ixra jína ich'e sin, la jehya kixin jehó chrókuitekaon sin ch'an.

²⁵*Mé xíkaha kóhen ti tjan Rahab, ti tjan k'uéchóna itsjé chojnindoa. Díos la kjuínchetjóá ti jehe tjan kixin kjuajon tjan kjuachaxin kuítqhe ti sin israelita ndoq tjan ti kjuíjitsjehe sin chjasén tjan, la kjuínkítsa tjan sákjuixin sin ókjé ntia. ²⁶Mé xíkaha éxi ti cuerpo chóntahya nchakuén la tsík'en, mé xíkaha ti titekaoni la tsík'en ti ninkehó ixra jína tjákoxinñani.

Ti nkehe nixja chojni

3 ¹Kíchóni, ícha jína chrók'uixinhña itsjé chojni chrókjuako kixin ti nduáhya chrókjuako sin la antsí tsjasóte sin. ²Kaíni chóntani ijje, andá ti nkojín nkexro nixjahya ninkehó nkehe nduáhya, la ijnko chojni jína tíha, la ó tsjacha ts'etuehen

kuenté ti cuerpoé. ³Éxi ti kokate chóna chika freno ti ir'ua va kixin tsitekaon va, la xikaha tsjachani ts'etuenheni kuenté ti cuerpoé va.

⁴Chrotsjehéra ti ntabarco, kjónté imá ijíé la ko tjian chjéhe xrinto, la ti nkexo tjiko, la kjónté ijnko inta intsí éxi jnko volante ó chonta, la tjacha tjendoáxin ti ntabarco kixin ndoá sátsji. ⁵Mé xikaha ti ñejeni. Kjónté ijnko nkehe imá intsí kuenté ti cuerpo, kjánchó nchónhña nkehe jínahña tsjacha tsondáchro. Éxi ijnko xrohi intsí la tsjacha tsochejinxín kuenté ijna, ⁶mé xikaha ti ñejeni la éxi ijnko xrohi, kixin nchónhña nkehe nduáhya t'axrjexín, la ncheníexín asén chojni, la tjacha tjasixíni ijie. Mé xikaha ti nkehe nduáhya t'axrjexín ir'ua chojni la tsjacha sinchek'itjáñaxín kaín ti nkehe jína, kixin chóna kjuachaxin kuenté ti Jínahña la ko ti síin xrohi nunca ts'ankahya. ⁷Mé xikaha ti chojni la tsjacha sinchesáncho kaín iko jiehe síin nteje, ti iko xritjaká, ti konche, la ko ti iko sínkankí ndañao. ⁸Kjánchó ti ñejeni la kohya ninxeró tsjacha ts'etuehen. Tíha mé ijnko nkehe jínahña la xitjahya tsítuehen kixin chóna nchónhña ichin ts'enixín chojni. ⁹*Ti ñejeni mé tjikosayéxini It'éni Díos la kjaxin t'ándaxiēnxini chojni tsíkjich'éna

Díos éxi tsjehe ch'an. ¹⁰Kjaxin ti ñejeni la chjéxini kjuasáya Díos, la kjaxin tíha t'ándaxiēnxini kíchóni. Méxra, kíchóni, xikahña chrókóhen. ¹¹Kixin nkoqoa tóye la xitjahya ts'axrje inta ixé la ko inta itsjá. ¹²Méxra kíchóni, ¿á jína kixin ti inta to higo la chrók'óna to aceituna o ti inta to uva chrók'óna to higo ní? O, ¿á jína kixin ijnko tóye t'axrje inta ixé, la chrók'uaxrje inta xjnta ní? Kjá náhi.

Ti kjuaxrexinkaon jína

¹³Andá ti itjen nkojín nkexo ti tjejora nohe jína la ko tienxín, la chrókjuakoxin nkojína la kanhñó chrókjuinchenke kixin chrókjuakoxin kixin jína nohe. ¹⁴Andá ti nkojinra chonta kjuachjinoxíhin asánra, la tjinkáonra jahóra chrókuétoanra, la chrókjuinchenkexínhñara ti nkehe nohara, kixin tíha la kjuach'ia la noahñara ti nkehe chaxín. ¹⁵Ti xikaha tjénkayáxinra, la chontahyara ti kjuaxrexinkaon tixin ti itjen Díos; tíha mé kjuaxrexinkaon kuenté chojni chjasintajni ó la ko kuenté ti Jínahña. ¹⁶Andá ti xikaha síin kjuachjinoxíhin la ko tjinkaon chojni jehó chrók'uetoan, la xitjahya tsóhen ixra jína kixin síin nkehe t'inkákonhen. ¹⁷Andá ti síin kjuaxrexinkaon jína tixin ti itjen Díos, la jína tjejó sin, kjuaxróxin

tjejó sin, la nkojína nixjehe kícho sin, t̄ikonoéhe kícho sin, ich'e sin ti ixr̄a jína la ko chaxín ndoá nixja sin. ¹⁸Ti nkexro tóxakohen tjejá ti kjuaxróxin, la mé éxi ijnko nkexro t'en̄ka ti kjuaxróxin, la x̄ikaha tsotjá ti nkehe jína.

Chrótjuehyani ti chjasintajni

4 ¹¿Xá nketí t̄ix̄in ti kjuanínkaon t̄jajonkoáxin kichuara? Tíha la t̄ix̄in ti nkehe jínahña t̄jénkayáxinra. ²Jahara t̄jinkáonra tsochontara ichrén nkehe, ndá ti chontahyara, la tónínkáonra la t̄jajonkoára chojni la ko t'oñára chojni. Tóchj̄in̄ox̄inhanra kixin chontahyara ti nkehe chón̄ta íso sin, la tónínkáonra la ko t̄jajonkoára sin. Jahara la chontahyara ti nkehe t̄jinkáonra kixin t̄janchehyara Díos. ³Andá ti t̄janchehéra Díos la t'ayéhyara, kixin nduáhya t̄jánchíára la ko t̄jinkáonra s̄inhexénhóra. ⁴Jahara titekákuénhñara Díos. ¿Á noahñara kixin ti imá tsotjuehéra ti chjasintajni la tsonínkakahénra Díos ní? Andá ti nkojinra ant̄sí tsotjuehéra ti chjasintajni la tsonínkakahénra Díos. ⁵¿Q̄ t̄jénkayáxinra kixin ti nkehe ndáchro xroon itén Díos, la chónkó ní? Kixin ndáchro: “Ti Nchakuén Díos k'uáyéheni la imá t̄juehe ti jeheni la tsonínkaon ti tsitoheni ti jehe

ch'an.” ⁶*Kixin Díos la imá t̄jinkítsa ch'an ti jeheni, méxra ndáchro xroon itén ch'an: “Díos la nínkakahen ti chojni ihnke, andá ti chojni nchenkehya la t̄jinkítsa ch'an.” ⁷Méxra ícha jína chrókuitekáonra Díos, la chrókūitoéhyara kixin ti Jínahña chrók'uetuáhanra, ndá ti x̄ikaha la ti Jínahña la sáchrokjui. ⁸Chrókóchjinehéra Díos, andá Díos tsochjina ti tjejora. Jahara chojni chón̄ta ijie, chrók'ontira itjára la ant̄sí chrótjuehéra Díos, andá ti chjasintajni la kanhñó. ⁹Ícha jína chrók'uavára, chrótsjankara la ko chrók'ueyara. Ti ijie tjanora la chrótsjankara, la ti cháhara la ícha jína chrótsjankara. ¹⁰Ícha jína chrók'uejoxinra tóch'inra chróchronoéhéra ñchén̄i, andá jehe ch'an chaxín chrókjuintañaora ch'an.

Chrok'uándaxiéhñani kichóni

¹¹Kichóni, chrók'uándaxiéhñara kichuara, kixin ti nkexro t'ándaxih̄in kícho la ko nchekitoéxin̄ ijie ti kícho mé t̄jikosayéhya ti ley. Andá ti t̄jikosayéhya sin ti ley, la t'óna sin juez kuénté ti ley la k̄j̄axin sin nchexiteyéhya sin ti ley. ¹²Andá ti ley la nokoqa nkexro kjuajon, la jehe ch'an mé ti Juez chaxín, jehe ch'an mé jína sinchekaá ch'an chojni ō sinchekjásote ch'an chojni.

¿Andá nkexro ti jahara kixin chrókjuínchekítuéxian ijie kuènté ijnko chojni?

Noehñani nkehe tsohen ndóye

¹³*Andá ijie tihínra tíhi, jahara ndáchrora: “Ijje o ndóye sátsjini ijnko chjasin ijie, la ntiha ts'ejóni ijnko nánó sinchekjini nkehe kixin tsjachani itsjé chichaon.”

¹⁴Andá jahara noahñara nkehe tsohen ndóye, kixin ti tjejóchóni la éxi ijnko tjinonte tuénxín ts'itjáña. ¹⁵Ícha jína chróndáchrora: “Ti tjinkaon Ìnchéni la naxa ts'ejóchóni la sich'eni ti ixra síin ntiha.”

¹⁶Andá jahara ti nixjara la imá ihnkera la kaín tíha la jehya jína.

¹⁷Andá ti nkexro nohe ich'e ti nkehe jína, ndá ch'ehya, la tjasin sin ijie.

5 ¹Tihínra tíhi, jahara rikóra. Chrotsjankara la ko chrók'uíyatonra kixin tsjasótiara.

²*Ti nkehe ricoxínra la ó tsíkotje la ti ika chontara la ó tsík'in kué.

³Ti oro la ko ti plata chontara la ó tsíköchjisen. Tíha mé ts'itjáñaxínra la tíha éxi xrohi tsochexínra. ¿Xá nkehe tsohen tjásitonra nchónhña nkehe tjete kixin ó itsi ti ñao tsjixixín?

⁴*Ti nkehe chrókjuacha ti sin kjuít'ahara ixra la kjuénkèhyara sin, la jehe sin tjanchia sin ijie, t'éya sin. Andá Ìnchéni chóna kaín kjuachaxin mé kuíhin kixin

ti sin kjuích'e ixra la tjanchia sin ijie. ⁵Andá ntihi chjasintajni la náxrjón tjejora la kaín nkehe tóxrhanra chontara, la éxi ijnko iko imá tsanká tjejora, ndá itsi ijnko ñao la its'en va, mé xikaha tsohanra. ⁶Kixin jahara la kjuínchekjasótera chojni ninkehó ijie chóntahya, la ko k'oñára sin kjónté kohya nkehe kjuít'ahara sin.

Chrókóxakuenhñani la chrónixjeheni Díos

⁷Méxra, kíchóni, chrókóxakuanhñara, chróchohénra tsokjan Ìnchéni. Éxi ti nkexro ich'e ixra nontee la chóhen tsoxrákoajia ti ichrin xránkíxixín la ko ti ichrin tsjixixín, ndá ti ó tsík'ónehe ndá tsotjá. ⁸Mé xikaha chrókóxakuanhñara, chróchohénra, la chrók'óxrjéhya asánra, kixin ti ñao tsokjan Ìnchéni la ó chjina. ⁹Kíchóni, chrók'uekahyara ijie kichuara kixin Díos chrókjuanchahya ijie ti jahara, kixin Díos, ti Juez la ó chjino itjen. ¹⁰Méxra kíchóni, chrókuankihíra ti sin k'uéchronka itén Díos kjuachaxien ihnjé Ìnchéni. Jehe sin la kjónté kjuasóte sin, la kónínkakonhña sin. ¹¹*Mé xikaha ndáchroni kixin chéhe ti sin a kixin, kjónté kjuasóte sin, la kjuacha sin. Jahara ó

kuihínra nkexrín kóhen Job. Ó nohara kixin Ìnchéni kjuínkĩtsa ti jehe ch'an ti ó kjuixin kjuasóte ch'an, kixin Ìnchéni la imá jína la tikonoehe ch'an ti nkexro tjasóte.

¹²*Méxra kíchóni, chrók'uakjénxinhñara ihnié Díos itjen nkaya nkajní la ko chjasintajni la nijnko ihnié nkehe chrók'uakjénxinhñara. Ti chróndáchrora chaxín, la chaxín ó, andá ti chróndáchrora náhí, la náhí ó, ndá xikaha chrókjuanchahya Díos ije.

¹³Ti nkojinra náxrjónhña tjejora, la chrónixjehéra Díos; ndá ti náxrjón tjejora, la chrótsjera chrókjuíkosáyehéra Díos. ¹⁴*Andá ti nkojinra níhara, la chrók'ueyehéra ti sin t'etoan kuèté ninko kixin chrónixjehe sin Díos, la chróchjéhe sin aceite ikja ti síníhi kjuachaxin ihnié Ìnchéni. ¹⁵Andá ti kaín asánra nixjehéra Díos la tsitohe jína ti síníhi, la ti ichrén ije tsíkjasin

sin la Díos sinchek'itjáña tíha.

¹⁶Méxra chróchenkara kichuara ti kjuásinra nkojín ije, la nkojnkorá chrónixjehéra Díos kixin tsjinkĩtsa ch'an ti jahara. Ti chojni chaxín jína la ti tsonixjehe Díos, la tíha chóna nchónhña kjuachaxin. ¹⁷*Elías, ti nkexro k'uéchronka itén Díos, mé ijnko chojni éxi jeheni, la nixjehe ch'an Díos kaín asén ch'an kixin chrók'uániáhña ichrin, la chaxín xrákoahya ichrin iní nánó kot'o.

¹⁸*Andá ti ó k'uatsínka ti iní nánó kot'o, ndá nixjehe ch'an Díos kixin chrók'uaniá ichrin, ndá k'uaniá ichrin la k'óna jína.

¹⁹Kíchóni, ti nkojinra chrókjuichròdera, chrókuítóhéra ti itan ndoá, ndá nkojín chojni chrókjuinkĩtsa chrókjanra ²⁰*la chrókónohara kixin ti nkexro tjinkĩtsa ti nkexro chóna ije tsokjanxin ti ntja jínahña kuék'aji, la ó kjuínchekaá ti nkexro a kixin ts'enhña, kjónté nchónhña ije k'uéchóna ch'an.